

EDICION SPECIAL HIMNO Y BANDERA

Nos placa arubano



Nos ta uza placa pa cumpra algo, Of pa paga un persona cu a haci su trabao. Of nos ta duna placa pa yuda un otro hende. Pa nos cosnan diario nos mester di placa. E economia di e pais ta draai rond di placa. Sin placa nos no por haci hopi.

Tur hende tin mester di dje. Segun historianan den tempnan remoto nan tabata uza colishi y cuenta, como medio di pago. No tabata existi placa, manera nos conoce awendia. Ta rond di 1800 Aruba a conoce e “guillotine” su forma



triangulo ta indica cu e tabata un dollar parti na cuater. Na e mesun tempo tabata tin un moneda yama “patin” cu tabata un peso of 8 real. Tambe tabata circula valenan di papel enbez di placa y balor tabata na “sol” e moneda Peruano. E tempo aya tabata uza placa manera: un ria, un doria, un chilin, tre jotin, un placa gay, un zeppelin, un gourdein y doria dos placa. Maske cu na Corsow nan a introduci e placa Hulandes, Aruba si a keda uza e peso cu tabata alre-



dedor di 2 florin y na 1827 a bira 1,333 florin. Mas despues e placa Hulandes tambe a wordo acepta na Aruba. Esakinan tabata tin skirbi “Koninkrijk der Nederlanden” ariba nan. Despues Antiyas a haya su propio moneda cu tabata tin e inscripcion “Munt van Curaçao”.

Te rond di 1950 e monedanan a wordo traha cu “Nederlandse Antillen” riba nan. E temponan ey tabata tin fuera di florin di plata un florin di papel tambe - un biyete cora - Tambe 2.50 tabata bin na un biyete. Esaki a disparce despues.

Tempo cu Aruba a haya su Status Aparte, Gobierno a introduci tambe e placa Arubano cu ta e “florin”. Kiermeen cu sea bo ta papia Hulandes of Ingles bo mester bisa por ehempel “drie florin” of “three florins” y no gulden of guilders.

Ariba e placanan di papel tambe tin diseñonan di bestia. Afls. 100,- tin un dori, Afls. 50,- tin un shoco, Afls. 25, tin un cascabel, ariba Afls. 10,- tin un calco indian y riba Afls. 5, - un turtuga blanco. Esnan di Afls. 5,- a sali door di circulacion y awor nos tin un placa color oro rondo pa Afls. 5,-.